



## KOMISAUN REFORMA FISKÁL

---

### KOMUNIKADU IMPRENSA

#### **Governu halo enkontru hodi prioritiza programa diversifikasaun ekonomia iha Turizmu, Agri-Turizmu, Pekuária, Komérsiu Transfronteirisu no Konektividade**

**Dili, 29 Janeiro 2019** - Timor-Leste tenke kontinua investe iha planu estratejia ba ekonomia ida ne'ebé modernu no diversifikadu, foka uluk ba setór prinsipál produtivu tolu: turizmu, agrikultura no pekuária.

Primeiru Ministru enkontru ho Membru Konsellu Inter-Ministeriál ba Reforma Fiskál atu prioritiza no adopta abordajen integradu ida ba implementasaun programa diversifikasaun ekonomia hodi suporta kresimentu ne'ebé sustentavel no atu harii baze ekonomia ida ne'ebé luan hodi hasa'e reseita dométika. Primeiru Ministru, Sr. Taur Matan Ruak hatete:

*"Konsellu Inter-Ministeriál serve hanesan órgaun planu estratéjiku no mekanizmu koordenasaun hodi ajuda ministériu sira holísticamente no ho efisiénsia servisu hamutuk hodi atinje rezultadu lalais ba povu; ita prezisa kria kresimentu ida ne'ebé sustentavel, hasa'e produtividade no komérsiu, kria tan servisu, fornese seguransa legál ba rai na'in no investidór sira nune'e mós hasa'e reseita doméstika ba 18% molok 2023".*

Diretór sira informa ba Membru Konsellu kona-ba servisu ne'ebé sira hala'o ona, dezafiu no oportunidade ne'ebé sira hasoru iha implementasaun programa diversifikasaun ekonomia.

Diretór ADB, Sr. Paulo Spantigati no Ekonomista husi Headquarters iha Manila apresenta Resultadu Estudu kona-ba Integrasaun no Kooperasaun Rejionál (IKR) no rekomendasaun sira atu komplimenta no apoiu setór prioridade sira ne'ebé governu implementa daudaun. Programa IKR dezeńha atu ajuda haforsa ita nia kuadru legál, apoiu ita nia instituisaun sira nia kapasidade atu hasa'e produtividade ba Agri-turizmu, no pekuária, ajuda enfrenta dezafiu sira hodi movimenta ema, merkadorias no transporte no hadi'ak konektividade hodi aumenta número turistas no komérsiu iha pekuária ho Indonézia. Ekonomista Kooperasaun Rejionál, Sra. Anna Fink hatete:

*"Ami kontente tebes hetan oportuniadade apresenta ba Konsellu ne'ebé hanesan apresenta marka krítikus iha ami nia parseria ho governu kona-ba kooperasaun transfronteirisu ho Indonézia. ADB hanesan organizasaun rejionál ida kontente atu apoiu Timor-Leste nia kresimentu ekonomia no objetivu atu tama ba ASEAN".*

Konsellu Inter-Ministeriál rona mós kona-ba Timor-Leste nia investimentu ne'ebé estende daudaun sistema Asycuda World hodi eletrónicamente simu no troka informasaun no fasilita komérsiu transfronteirisu. Atu ramata, UNCTAD nia Edifísiu Rejionál ASYCUDA World

ba Ázia Pasífiku apresenta dokumentu Projetu ASYCUDA World hodi estende Timor-Leste nia janela únika nasional ba Governu nia Ajensia 9 no hamutuk ho Komisaun Reforma Fiskál informa ba Konsellu kona-ba planu tékniku atu dezenvolve prototipu rua ba janela únika rejional no inter-rejional. Koordinador Programa UNCTAD, Sra. Marianne Dumont hatete:

*"Timor-Leste nia Janela Únika tenke sai mós hanesan dalan hodi troka dadus ho nia parseiru komérsiu sira, iha nasaun ASEAN (ezemplu: Indonézia) no CPLP (ezemplu: Brazil, Portugal). Sistema integradu no facilidade no gateway ka odamatan tama sai sei sai hanesan oportunidade atu estende asesu ba merkadu iha nivel globál no atu dudu kresimentu negósiu no dezenvolvimentu empreendedorismo".*

Aprezentasaun ikus ne'ebé importante mós apresenta husi Diretor Tékniku Sistema Nacional de Cadastro (SNC), Sr. João Loução ne'ebé informa ba Governu kona-ba progresu ne'ebé halo ona hodi rejistu ho sistemátiku kadastru 234,438 dezde Setembru 2014 to'o 2018. Rejistu ida ne'e sei regulariza na'in ba rai ho benefísiu boot ba sósiu ekonomia nune'e mós fornese seguransa legál ba investidor sira. Ministru Justisa, Sr. Manuel Carceres Costa hatete:

*"Projetu SNC sei fornese ba Governu instrumentu forte ida atu define no implementa polítika fiskál no ekonómiku, obras públiku, planu uza rai no polítika ambiente".*

Ministériu competente sira sei kontinua servisu hamutuk hodi dezenvolve planu servisu integradu hodi implementa programa sira, monitoriza rezultadu no regularmente hato'o relatóriu ba Konsellu Inter-Ministeriál.

###

*Atu hetan tan informasaun, favor kontakta: Cecilia Tilman Gonçalves, Komisaun Reforma Fiskal, iha +670 7727 6436, ctgoncalves@mof.gov.tl*